

四庫全書

集部

欽定四庫全書

集部

雞肋集卷五十四

詳校官庶吉士

臣初喬齡

侍讀臣孫球覆勘

覆校官主事臣李駿

校對官中書臣王鍾泰

謄錄舉人臣邵颿

欽定四庫全書

雞肋集卷五十四目錄

表

賀皇帝登寶位表

賀太皇太后稱尊表

賀皇太后稱尊表

賀皇太妃牋

賀太皇太后進奉表

賀皇太后進奉表

賀皇太妃進奉牋

代蘇翰林為皇弟諸王賀冬至節表

代蘇翰林為皇弟諸王冬至賀太皇太后表

代蘇翰林為皇弟諸王冬至賀皇太后表

代蘇翰林為皇弟諸王冬至賀皇太妃牋

代蘇翰林為皇弟諸王賀冬至表

代蘇翰林為皇弟諸王冬至賀太皇太后表

代蘇翰林為皇弟諸王冬至賀皇太妃牋

代蘇翰林為皇弟諸王賀元日表

代蘇翰林為皇弟諸王元日賀太皇太后表

代蘇翰林為皇弟諸王元日賀皇太后表

代蘇翰林為皇弟諸王元日賀皇太妃牋

代北京留守王太尉元日賀表

代北京賀坤成節表

齊州賀興龍節表

齊州進奉功德疏表

齊州進興龍節銀絹表

代張恕單州賀受璽表

四月朔日蝕禮部請皇帝御正殿第一表

四月朔日蝕禮部請皇帝御正殿第二表

進罪言表

謝賜校定資治通鑑表

哲宗實錄開院謝賜銀絹表

哲宗實錄開院謝賜筆硯紙墨表

代范祖禹等實錄開院謝賜物表

代范祖禹等實錄開院謝賜物表

代范祖禹等實錄開院謝賜物表

代范祖禹等實錄開院謝賜物表

代范右丞謝賜生日禮物表

齊州謝賜歷日表

河中府謝賜歷日表

謝賜春衣表

代北京留守謝賜冬衣表

雞肋集卷五十四目錄



欽定四庫全書

雞肋集卷五十四

宋 晁補之 撰

表

賀皇帝登寶位表

欽承顧命嗣履寶圖謳歌有歸華夏均慶臣謝中恭惟皇

帝陛下挺生聖德夙有仁心問寢彰純孝之誠主鬯著

克恭之美大明繼照至健體元邦之榮懷人所歸往不

顯亦世是開上帝之符無疆惟休咸曰吾君之大天地

日月廓然泰清山川鬼神罔不順序鴻基滋固景命方  
綿凡在羣倫舉知慶蹈臣等恪居外部親覲重熙不獲  
恭詣闕庭

賀太皇太后稱尊表

冊嚴備禮位荅常尊宮闈之奉載虔海宇之歡普洽臣  
某中謝恭惟太皇太后陛下挺生聖哲夙著惠慈昊穹眷

懷宗廟昭假輔文祖勤勞之理隆神孫保佑之功是稽  
兩漢之舊章用對三朝之光命聖人孝治天下風行臣

聞成王持盈不敢忘文武之謨烈周姜思媚故能貽任  
姒之齊徽聿收前功允屬盛際萬世永賴百祿是道臣  
伏限職事在外不獲躬詣闕庭

賀皇太后稱尊表

位著徽稱居天下母儀之貴禮嚴備物昭聖人子道之  
成宮闈載祇海縣胥慶臣某

中謝

恭惟皇太后殿下懿恭

性得慈儉身先坤極正於內朝陰教行於四國用膺光  
命允荅常尊漢典具修式虔長樂之養周詩足繼大顯

思齊之功臣伏限職事在外不獲躬詣闕庭

賀皇太妃牋

冊嚴異數位著徽名光舊典於古今溢歡心於內外

中謝

恭惟皇太妃殿下令儀身率淑德性成輔佐先朝憂勤  
內寢屬大明之繼體孝治增隆飭備禮於有司尊稱允

荅

賀太皇太后進奉表

尊祖徽名冊已光於備禮修臣常職享莫尚於多儀輒

罄菲誠仰干聰聽上件物中邦羨賦外帑宿珍載申守  
部之虔用佐充庭之實

賀皇太后進奉表

長樂稱尊冊已光於備禮庶工率職享莫尚於多儀輒  
罄菲誠仰干聰聽上件物中邦羨賦外帑宿珍載申守  
郡之虔用佐充庭之實

賀皇太妃進奉牋

綸言誕告冊命顯加欽甚美之崇名慶已成之備禮官

聯無遠獻享具來上件物山澤之珍蠶桑所入申提封  
之祇恪佐庭實之輝華

代蘇翰林為皇弟諸王賀冬至表

經謹周正厯推子朔景短窮而長至卦剝盡而復來慶  
始宮闈歡均海縣恭惟皇帝陛下中和致理仁孝承祧  
化本時行元統天而不息德方日起明出地以無疆觀  
雲道民物之康寧居待陰陽之定履端於始求福不回  
臣親託本支生陶惠愛傾一心而猶藿祝萬壽以如山

代蘇翰林為皇弟諸王冬至賀太皇太后表

衡端氣至候炭仰而鐵低表北景長知人和而歲美宮  
闈均祐寰宇交歡恭惟太皇太后陛下睿智不居慈儉  
為訓本文之聖大顯思齊之光致成之功竝膺既醉之  
福斟酌歲始天地節而四時成蓂莢日新陰陽爭而諸  
生蕩有赫臨下無疆惟休臣身託宗藩恩均鞠育用率  
先於庶位敬傾祝於萬年

代蘇翰林為皇弟諸王冬至賀皇太后表

律當乾九六氣資宣養之端陽潛地中七日知來復之  
候宮闈均慶民物同歡恭惟皇太后殿下德重母儀位  
隆坤極既助烈考本朝夕之憂勤用綏成王致神祇之  
安樂孳萌伊始福祿來綏臣親託衆多之支恩叨均一  
之養協輿情之善祝介眉壽之維祺

代蘇翰林為皇弟諸王冬至賀皇太妃牋

營室昏中招搖北建獻履綦而迎慶書雲物以知祥恭  
惟皇太妃性稟惠和德崇恭儉雖鳴警戒之志美見於



先朝凱風劬勞之心恩隆於嗣聖順迎陽旦茂擁殊休  
期仰贊於延洪惟輸殫於頌詠

代蘇翰林為皇弟諸王賀冬至表

易謹閉關蓋待陰陽之定傳先書物以知天地之祥惟  
昔宅尊與人同慶恭惟皇帝陛下剛柔體道動靜得時  
齋戒自修將神明其至德裁成與合用左右於斯民薰  
陶太和積累至治臣本支同體茅土分封擬續周詩申  
百福而千祿敢忘漢禮稱萬壽以獻觴

代蘇翰林為皇弟諸王冬至賀太皇太后表

立表土中驗日躔之南至求端天事迎陽德之大來惟  
茂對時乃介景福恭惟太皇太后陛下道參穹厚澤及  
飛潛生民本姜嫄之仁終配天者后稷思齊詠大姓之  
美要成聖者文王九功可歌五躔咸備臣疏封盤石託  
體螽斯幸覩太平之期跨三五德願祝無疆之壽何干  
萬年

代蘇翰林為皇弟諸王冬至賀太后表

周歷授時氣必先於子朔漢儀賀至事亦謹於陽生履  
端不愆介福是荷恭惟皇太后德崇慈儉道配直方長  
樂稱尊大備安榮之養闡睢本化永隆信厚之風與國  
同休溥天共祝臣恩叨均一身託藩維敢傾向日之誠  
願贊如山之壽

代蘇翰林為皇弟諸王冬至賀皇太妃牋

璧合珠連會三辰於初紀芸生荔挺兆萬物之華心宮  
闡同歡民物胥賀恭惟皇太妃化行恭儉德合徽柔保

佑帝躬恩已隆於色養講明國典禮何歉於常尊孳萌  
益新順履惟吉某親聯宗屬身託廕庥徒傾頌詠之誠  
願贊延鴻之福

代蘇翰林為皇弟諸王賀元日表

璣衡窮次夏小正以首時玉帛會朝漢兩京之盛典恭  
惟皇帝陛下法天之道如日之升撫於五辰庶政所以  
咸理惠此中國萬方所以來同以初為常母有不當臣  
忝同氣之重託維城之安慶五百歲之符適逢茲旦上

千萬年之壽敢廢舊儀

代蘇翰林為皇弟諸王元日賀太皇太后表

日回月周辰集詠訾之紀天清地肅風來東北之方恭  
惟太皇太后陛下盛德在躬至仁被世裁成其道故能  
應君子之大來嚮用其休將以錫庶民之保極順時滋  
養與物亨嘉臣親託本支恩分茅土悅九成之備奏稱  
萬壽以獻觴

代蘇翰林為皇弟諸王元日賀皇太后表

魯史書春事蓋先於五始漢儀朝朔氣亦謹於三微恭  
惟皇太后殿下順體坤元慈隆母訓化行內外關雎爰  
始於興王神無怨恫思齊要本於成聖新陽肇布景福  
來符臣託宗藩之親均鞠子之愛願協輿情之頌倍膺  
眉壽之祥

代蘇翰林為皇弟諸王元日賀皇太妃牋

玉燭成書慶新元於端月椒花入頌美舒景於青陽恭  
惟皇太妃率性柔嘉宅身恭儉承上以禮光女德於詩

書撫下有恩冠嬪儀於宮寢安榮所享積累而成某內愧孱蒙預叨休蔭願履三元之旦倍膺百順之祥

代北京留守王太尉元日賀表

臣某言伏以盛德在木正月始和聖人謹於履端天下從而觀治臣某

中賀

恭惟皇帝陛下效天法地扶世導民

爰樂六龍乃大一統當五百之運有二十之功仁義極乎漸摩禮樂備於制作順孟陬之吉旦舉元會之上儀放勲欽明授人時而不忒周王壽考維天命以無疆臣

某守齋留都傾心法座眷言象魏莫陪百執事之趨自  
幸華封常罄萬斯年之祝

代北京賀坤成節表

建畢占中歷紀金行之始妊姜協聖禮嚴坤德之成率  
土傾心後天申祝恭以太皇太后陛下慈仁世濟睿哲  
生知昊穹所懷宗廟攸享配烈祖勤勞之禮隆嗣王保  
佑之功盈成祇慎於薄冰豐美大蒙於潤澤式虔至養  
允荅常尊誕惟考室之詳肇屆登禾之候謳謠歸美華



夏舉同伏願太皇太后百順咸臻三靈共贊天高地厚  
扶不拔之洪基松茂竹苞資無疆之妙算臣限拘鑰守  
阻預鳧趨

齊州賀興龍節表

臣補之言臣聞必世而後仁故百樂興於已治宜民者  
受祿則五福本於能敷人神克寧雅頌斯作欽遇誕彌  
之吉仰期於穆之休臣補之誠驩誠抃頓首頓首恭惟  
皇帝陛下繼禹勤邦繼文配命深明措國蓋在酌言道

斯行而動斯和無非事者生不傷而厚不困所欲與之  
用能格精祲以降康交驩欣而養本大有天助豈徒河  
洛之效祥靈臺子來咸思父母之難老臣久塵冊府方  
領郡章慶五百歲之期親逢穀旦祝千萬年之壽祇劇  
葵心瞻望闕廷臣無任仰天祝聖激切屏營之至謹奉  
表稱賀以聞臣補之誠驩誠抃頓首頓首謹言

齊州進奉功德疏表

臣伏以大呂應時氣協明昌之運至神出震應符誕育

之辰天人所歸遠邇胥慶恭惟皇帝陛下誠明天縱睿  
智日新嘉祉富民至仁浹物重華協帝增光六聖之功  
下武繼文垂視萬方之治謳歌所屬精稷儲休神電遶  
樞陶陰陽之粹美祥虹流渚孕造化之精英鼓舞太平  
揄揚善頌臣誤恩剖竹一意望雲雖漢殿捧觴莫預千  
官之列顧舜庭儀鳳第同萬壽之稱臣無任瞻天祝聖  
激切屏營之至謹隨狀上進以聞謹進

齊州進興龍節銀絹表

臣伏以夢龍叶瑞元符神策之歸望氣表祥夙契人心  
之慶幸邁寢昌之旦敢修飾喜之儀前件物人賴垂衣  
地思薦寶盡出盈餘之力用將頌詠之誠充預大庭足  
備梯航之富懇祈睿算永齊箕斗之明所有銀絹見寄  
本州軍資庫候有上供綱運附帶入京次謹先具附遞  
入進以聞干冒冕旒臣無任惶懼激切屏營之至

代張恕單州賀受璽表

王事之修光昭夷夏天休所動玉出咸秦因月吉之視

朝肆禮成而均慶

謝中

臣聞物其有矣命不易哉蓋政苟

雖幽而不通則類有不召而自至所以三腋作典猶懷

俘寶之慙四海告功方贊錫圭之異惟德之視從古以

然恭惟皇帝陛下若昔大猷顧諟明命繫有憑有翼而

罔墜故無聲無臭而來臨俾壽而昌皇已彰於眷佑則

篤其慶民亦念於用敷故滌洪恩以覃方域臣偶拘守

土阻覲盛儀

四月朔日蝕禮部請皇帝御正殿第一表

臣某言伏奉詔命以四月一日日蝕避正殿減常饗者  
占辰弗集馳走逮於嗇夫肆宥惟時鞭扑空於司寇未  
即路朝之正猶推玉食之供凡在臣工莫遑寧處竊以  
日符天統當循黃道之常君體乾剛故謹正陽之畏惟  
聖人觀象以立戒欲王者因事而自修亦緣久動而必  
差乃有頻交而屢蝕中教恭惟皇帝陛下中正履位清明  
在躬孝承七廟之安仁暨萬邦之德官惟賢而士勸善  
罰當罪而民禁非奉以無私要本容光而必照建其有

極蓋用勿憂而宜中固念茲而在茲寧弗畏而入畏緊  
寅恭可謂至矣則變異何從召之應以至誠居然純曜  
祥桑不拱方知太戊之興雖雉何為益見高宗之盛宜  
光臨於黼扆且時御於饗飧茂迎至和允荅羣望

四月朔日蝕禮部請皇帝御正殿第二表

徒傾葵藿之誠敢期回照未竭潢汙之滴尚或可羞矧  
變異之已消尤故常之當復

中

敕恭惟皇帝陛下法禹罪

已繼文小心惟五事之罔愆於三光而何累爰以朔旦

自興重雲不用其行史前占於必蝕增修於德人莫覩  
其或虧和足致祥順宜獲助而猶謙尊自牧震虢靡寧  
雖天所以愛人君常欲制於未亂而王所以奉天道故  
當懼於無災然與其戒居處飲食之安孰若擴視聽猷  
為之善豈惟過也見而更也仰是謂應以實而不以文  
南面宅尊達四聰於虞舜大庖日御綏五福於周成庶  
或聽卑終聞詔可

進罪言表



臣小官疎外名姓無聞竊比負暄上塵天鑒臣於熙寧  
中聞交趾犯順王師出討臣嘗憤悱忘鈇鉞之戮願效  
區區謬為安南罪言一篇於時臣在畎畝又居父喪深  
思愚賤且越禮制以干國事既成躊躇將進復止今師  
還累歲遠服來享而臣所欲言頃已草具留之私室義  
不敢安譬夫鷦鷯已翔於寥廓而羅者猶視乎藪澤臣  
誠疲駑豈足及事其所謬文字謹繕寫成一冊以安南  
罪言為目用黃羅帕封隨狀上進伏望聖慈特垂聽覽

干冒冕旒臣無任惶懼屏營激切之至

謝賜校定資治通鑑表

進奏院遞到校定資治通鑑所牒伏蒙聖恩賜資治通鑑若干冊付臣者先朝稽古之意名臣敘事之才成書甚難來世所考故乏丹鉛之補預蒙細帙之頒臣補之中謝伏以英宗皇帝睿哲生知憂勤遠慮欲觀歷世君臣張弛之跡以知千歲治亂得失之原深詔耆儒特加撰錄神宗皇帝孝思善繼聖學博通三臣竝封不特詩止

之歎五季更授厥惟麟止之終發於雲漢之章賜以龜  
鏡之目恭惟皇帝陛下論唐虞而圖治舉元愷而佐功  
興亾灼知屢省觀於乙夜忠佞大判爰警戒於在廷以  
嘗預於校讎故亦霑於賜予頒學官而伊始藏私室以  
至榮臣聞惟賜不常論報宜一圭瓚乃輦車馬則棄雖  
臣狹識而淺聞妄意深求而博考思事君許國之義奉  
以捐軀資愛民利物之方用而從政庶逃虛受之耻仰  
答非常之私

哲宗實錄開院謝賜銀絹表

臣等伏蒙聖慈特降中使賜臣等銀絹者屬辭比事將  
為千載之傳抱慙懷鉛未有一毫之效寵先臨於使指  
恩已逮於匪頒謝中此蓋伏遇皇帝陛下受祿于天修身

以道因心篤慶本王季之事兄彌性似先乃成王之為  
子稽哲宗之政理亶神考之規摹雲漢在天丹青莫像  
是用飾茲典領共俾討論曾微草創之勤遽忝幣餘之  
錫簡編充宇蠡測海以安能歲月累功葺成山而儻可

誓殫綿力仰贊成書臣等無任

哲宗實錄開院謝賜筆硯紙墨表

臣等伏蒙聖慈特降中使賜臣等筆硯紙墨者紬繹信書闕官曹而伊始詢謀故事給筆札以為先枉異數之

曲加撫寸長而安有中謝此蓋伏遇皇帝陛下挺生聖質

丕變人文維先朝迪哲之光有繼序適求之美森然斷

簡豈徒副在有司燦若列星乃可傳諸無極而臣等職

司典領叅備纂修甫窺東觀之藏遽忝上方之賜精毫

良楮堅石鑿煤食浮已愧於事先器利尤慙於匠拙遷  
固特稱乎良史蓋以覈詳荀表但謹於編年庶無疏抵  
誓當殫竭以荅寵私臣等無任

代范祖禹等實錄開院謝賜物表

述修先訓攷次新書開省閤之嚴深詔宰司之典領計  
論既重付畀尤慙敢圖比事之初遽忝上方之賜此蓋  
伏遇皇帝陛下孝思維則善教得民率時昭考之功維  
十九年之記副在有司之事乃數千歲之傳以臣誤被

揀掄預聞紬繹黜煤吳石蔡楮蒙毫燦然四物之精出自九重之祕未知報稱徒遽矜榮模青天白日之容固無心巧輯斷簡遺編之美尚或力能誓殫見聞少補毫末

代范祖禹等實錄開院謝賜物表

伏以論先朝無競之功垂來世不刊之訓凡在官聯之選固稱儒學之榮編摩未效於寸長筆札遽叨於異數此蓋伏遇太皇太后陛下懋昭大德對越在天稽神宗

制作之隆倬為令典當嗣聖纂承之始付畀成書詢求故事之餘均及上方之賜霜毫之潤溪石之堅墨以代鉛紙惟易輟顧裨諶之草創積日何功儻荀悅之編年它時有考粗期輸竭不愧寵私

代范祖禹等實錄開院謝賜物表

鉛槧之功未聞於少補金縢之牘首逮於匪頒枉使指之光華拜君恩之隆渥此益伏遇皇帝陛下恭默當乎思道愛敬隆於事親迹熙寧訪落之勤迄元豐顧命之



重憲章咸在誤述宜加甲敕有司叅稽故實眷言叢陋  
預被選掄既其論次之初均以幣餘之錫夫居其官則  
思事懷其祿則赴功固雖狹識而淺聞妄意深求而博  
考粗祈薄效仰贊成書

代范祖禹等實錄開院謝賜物表

預聞紉繹未有毫釐遽煩使指之臨首拜幣餘之錫被  
蒙寵渥增愧矜榮此蓋伏遇太皇太后陛下對天之休  
以慈為寶維先朝之政理在太史之冊書將欲為無窮

之傳故必著不刊之典咨求故實付畀有司眷言選掄  
猥在蕞陋屬討論之始事均賚予以勸功攬制作之原  
浩如觀海積編摩之助儻或成山誓殫淺聞仰荅鴻造

代范右丞謝賜生日禮物表

棘薪永慕載臨生育之辰橐飫特加申用故常之錫光  
華白髮感激丹棕

中謝本

乏將明粗知忠孝蒙先臣之遺

業遭累聖之致平遍履閭臺遂聞機政至仁獨運方興  
不世之勲未議數殫未有秋毫之補而適遇桑蓬之旦

重叨庖廩之頒已懼素餐安知報禮斯蓋伏遇皇帝陛下  
臨九有子惠羣工體貌所加措紳咸聳觀酒食之  
象君有施而心親誦股肱之歌臣無功而形渥誓當糜  
隕仰荅生成

齊州謝賜厯日表

臣補之言准進奏院遞到宣一道賜臣紹聖二年厯日  
一卷者臣聞迎日推策在昔黃帝之御邦以初為常自  
時周王之賦政臣叨守長職在承宣樂與吏民同遵詔

令臣補之誠惶誠懼頓首頓首恭惟皇帝陛下修身以道求端于天璧合珠連煥三辰之順晷雲行雨施肇萬物之華心雖歲事之宜頒本王功之最急璣衡潛運孰知聖治之日新鉅鐸時修已覺豐年之氣應臣無任戴天荷聖激切屏營之至謹奉表稱謝以聞臣補之誠惶誠懼頓首頓首謹言

河中府謝歷日表

臣補之言今月二十五日都進奏院遞到宣一道伏蒙

聖恩賜臣崇寧元年歷日一卷者初郊上帝肇改新元  
謹堯歷以迎推因夏時而誕布偶竊藩維之寄預蒙歲  
首之頒臣補之誠惶誠懼頓首頓首恭惟皇帝陛下動  
靜以道而大光先後於天而與合本諸修己雖聰明睿  
智足以臨用此求端蓋風雨霜露無非教將以撫五辰  
而熙績和三事以敘功臣職在牧民欣於奉令土牛將  
磔猶歌二日之鑿冰玉燭可調願頌豐年之多稔

謝賜春衣表

臣補之等言勾萌畢奮慶賜可行土牛久飾於送寒幽  
籥未歌於逆暑迺春造庭之彥爰開在筭之良肆有等

差均於覆被

謝中

恭惟皇帝陛下宜人布政育物為功卉

皮自適於陰陽氎毳同和於天地既陶無外之化亦霑  
咸若之恩織筐亂流豈惟加五百里之遠女工同燎故  
復半三十日之收矧是具僚與之同體適及風雩之後  
大頒帑帛之珍君賜足榮不嘆無衣之七王章有分庶  
逃終褫之三誓各糜捐以圖報稱

代北京留守謝冬衣表

涼風退暑流火戒寒爰開在筭之良式厚兼衣之寵居

然被服同此恩榮臣某等

謝中

恭惟皇帝陛下至健體元

大明燭隱室灰為候載先栗冽之期帑帛用頒肆有等  
差之賚臣等均雨露重霄之施忘冰霜瀕朔之勞誓竭  
愚忠仰酬聖造

雞肋集卷五十四



欽定四庫全書

雞肋集卷五十五目錄

表

齊州謝到任表

南京謝到任表

亳州謝到任表

信州謝到任表

河中府謝到任表

湖州謝到任表

謝得請南京鴻慶宮表

謝得請江州太平觀表

泗州謝上表

代河北提刑王朝散謝上表

代朔漕蹇侍郎謝獎諭表

代朔漕李楚老謝獎諭表

代北京謝太皇太后垂簾戒飭官吏表

代朔漕蹇周輔謝除侍郎表

代澶州守韓太中授官表

代劉中書謝加勲封表

代劉門下謝表

代劉門下謝表

代韓太中乞致仕表

代司馬康子植謝應副葬事表

代司馬康子植謝應副葬事表

雞肋集卷五十五目錄

欽定四庫全書

雞肋集卷五十五

宋晁補之撰

表

齊州謝到任表

臣補之言伏奉敕命差臣權知齊州軍州事臣已於六月十六日到任交割訖從臣之欲獲奉親輿便臣之私使近鄉邑愚衷自擇其所處素望亦何以復加惟寄重而才微且人輕而恩渥循涯深覩隕涕難收臣補之誠

惶誠懼頓首頓首伏念臣五世簪纓一介韋布涵濡禮義砥礪鑛頑先帝起經術之殘偶叨賜第陛下修館閣之舊首玷具員傳毛羽而使翔弛轡銜而要至獨行偏上不知所學之何施少與數竒祇有此心之自信丐廣陵之貳政在元祐之五年從簿書中以著作召雖此職名存而實廢然常情內重而外輕再陪英俊之游亦幸採收之及而臣拙糴滋爾貧窶仍之厯塵中秘之五資坐守集仙之四庫未嘗任毫末事安得有膚寸勞於法

既當為州還朝又已踰歲用復傾於肝鬲至兩瀆於冕旒敢圖包荒重此得請假濟南之印紱近大野之墳廬此蓋伏遇皇帝陛下發天縱之多能為日新之盛德謂未有廩而不試蓋必將試而後知故茲愚疎亦在器使再念臣所領郡耕織甚饒人之愛生法令易擾雖閭閻多智不無從昔之土風而平易近民亦有當時之政事臣願布宣上德利養下氓儻小假於歲時必粗殫於駑蹇臣無任感天荷聖激切屏營之至謹奉表稱謝以聞

臣補之誠惶誠懼頓首頓首謹言

南京謝到任表

臣補之言臣昨任知齊州為揚州修過摘星樓事伏蒙  
聖恩特從寬典就差通判應天府臣已於三月二日到  
任上訖小已下僚昧於職守盛時公議特此貸全未使  
廢閑猶叨安便媿深汗溢感極涕橫臣補之中謝伏念臣

家世凋零在朝廷者無幾人材闐茸所學問者又非猥  
迫寒饑出營仕進本自安於常調固絕望於亨塗庶幾



孤愚不越分量而偶弼臣之一薦濫文館者十年初無毫毛得被驅策徒累資任以致麾符臣自揣思久當顛沛加以祚薄多故器小易盈不能恪居於其官遂使咎生於所忽幸仁聖矜其如此故迂疎尚以并容第解郡章旋霑祿食將母之幸於臣已多德大施隆身微命賤戚遂莫悔啟處若驚恭惟皇帝陛下明目達聰與人為善畢修祖宗之舊政遍攬中外之英才建官惟賢宥過無大雖憑生之螻蟻亦蒙賴於乾坤臣敢不謹畏自新

忠誠內誓念洗心以償罪譴既負負無可言思發憤以  
赴功名又區區不足道報恩無所碎首為期

亳州謝到任表

臣補之言臣昨知齊州緣舊公坐正月十日准敕降通  
判南京礙親回避九月三日准敕就差通判亳州於當  
月二十五日到任上訖咎悔難追已更寒暑嫌疑自列  
敢憚道塗再服寬恩重增感涕臣補之誠惶誠懼頓首  
頓首伏念臣粗知學問本乏材能仕豈為貧慙居卑之

亦分家雖積善傷餘慶之已微嘗念居不可以求安福  
孰先於無禍故六年遷徙甘常困於米鹽而羣從凋零  
祇自憐其形影未敢當江湖飛集之數何足掛朝廷論  
議之間每欽宥過無大之仁則思見危致命之義未試  
以事孰明此心諒與釜之已多誠挈瓶之何有但知揣  
已皆是踰涯恭惟皇帝陛下惟時憲天常善救物稽先  
朝之美意與治古以同興謂蕩蕩民無能名佑啟我以  
正故業業日致其孝繼序思不忘蓋欲得萬國之歡心

足以斂五福而敷錫雖甚微鄙不終棄捐重念臣頃迫  
養親久從補外昨由公坐得譴止以佐官連書亦既累  
年實更三赦事雖自致情則無它庶省循苟免於人非  
或湔洗稍容於國是犬馬能報況服冠裙擣櫟無堪猶  
足燔燎終自知其死所不敢愛於身先瞻望闕廷臣無  
任感天荷聖激切屏營之至

信州謝到任表

臣補之言先奉敕落祕閣校理添差監處州鹽酒稅尋

丁母憂服闋奉敕添差監信州鹽酒稅已於閏九月十  
二日到任管句訖初免親喪再塵仕綴嘗干國典復以  
罪行夙涉江湖祇臨物局戴深仁而自幸俯餘息以知  
危臣補之頓首頓首伏念臣家世衰微人材駑下少不  
天而孤露長無類以僻違濫先朝經術之科玷陛下文  
館之選至於積累資仁忝冒麾符雖區區揣已分量之  
餘實碌碌同時流輩之後內則詢事考言而蔑秋毫之  
獻外亦承流宣化而乏膚寸之聞豈惟有悔之莫追自

以無功而應汰含容渥厚昧惜顛隳咸股往以得嫌旅  
巢焚而誰咎神理交譴家禍併嬰弔影內慙捫心外慄  
當滅亡於苦塊尚收錄於簪裳又竊便安惟深感涕斯  
益伏遇皇帝陛下道隆前烈澤浸萬方皇穹降康休應  
屢至故簡弗率亦敷在寬為鳥及魚不出天淵之內息  
黥與劓尚容鑪錘之間臣敢不省已愆尤誓心忠義哀  
荒未復懷色養以終天罪垢難湔報明恩而無日

河中府謝到任表

起廢來還荐更郎選屬饜為請復假藩麾初見吏民敬  
宣條教明恩未報感涕徒揮伏念臣稟生拙竊遭世隆  
盛知寡尤所以干祿非曰能之謂崇德在於安身終不  
近也薰心自艾補劓無期雨露不私勾萌亦奮惟兩朝  
之聖政在太史之冊書首以非才叅於羣俊青天白日  
道至大而難摹黑髮丹心力不能而知止卒緣累懇因  
得便私粵自劇曹付之名閭差馬不勞於吉日乞漿更  
值於豐年散族再收啼饑皆飽斯葢伏遇皇帝陛下斂

五福以敷錫協萬邦於時雍重華如虞氏則既以用其中丕承如武王則亦不忘乎遠固特重監司守土之任蓋嘗視省官卿寺之除臣願深體至懷粗推所學庶幾一日之必葺敢意三年而有成

湖州謝到任表

臣補之言奉敕就差知湖州已於四月二十九日到任訖始解蒲中即臨雲上去股肱之要郡得山水之名城除授每優事功常歎愚衷內揆感涕交揮臣補之謝中伏



念臣本以寒生起於下國竊勤少日既孤露以不天問  
學長年又僻違而無類未足稱王裴之選奚取銓衡不  
能措游夏之辭何知筆削一昨所自陳列皆出悃誠已  
憂疾憊之莫勝更覺才殫之難彊恐隕越無以塞責故  
蹲循冀於食功終賴察微俾從補外逮今移徙復竊便  
安然臣自惟何人微幸迺得若此斯蓋伏遇皇帝陛下  
道光前烈仁覆羣倫瑾瑜所貴於匿瑕管蒯可收而代  
匱故容器使屢及下材而臣以五十歲服官之時當二

千石共理之任有心許國蓋蚤脫於冗員無地輸忠但益修於常職臣無任感天荷聖激切屏營之至

謝得請南京鴻慶宮表

罪蒙一洗幸已難逢未忘兢惕之初遽有便安之請天不難於平施物自慶於曲全論報無時捫心有覲謝中伏

念臣積衰之系始冠而孤本以下才甘於常調而偶在選掄之末旋招譴咎之隨尚賴拙疎希當事任是以頃先獲宥晚益附輕就付宮祠實養以官曹之佚優加廩

給又卹其私室之空德厚不貲愧深罔措斯蓋伏遇皇  
帝陛下躬舜大智法湯克寬董之用威予以馭幸故明  
詔飾其能改而申令許以復收臣敢不日夜以思妻孥  
相誓念方素飽歉孚於事實之能惟勵赤心遵懼以終  
始之戒

謝得請江州太平觀表

起廢恩優薄從裁抑包荒德大終畀便安以平時不敢  
僭求而一旦曲從私欲捐生莫稱灑涕自驚臣補之誠

惶誠懼頓首頓首伏念臣家世衰微人才嵬瑣生五十  
一歲行身未免於悔尤仕二十四年責實固無於毫末  
流離困劇祗緣梧鼠之技窮湔洗召還寔遇飛龍之施  
普愚不知於適變狂猶念於安常一昨罷還中銓當守  
遠郡惟祠宮為之加餼廩本先朝所以優臣工豈圖棄  
置之餘亦被生成之賜雖乏可依之田晦不遠在望之  
松楸荷天至私跼地罔措斯蓋伏遇皇帝陛下體成王  
之為子本王季之事兄彌性似先因心篤愛持循舊法

開示有容故臣所蒙於分猶過未溘先於犬馬終願馳  
驅亦嘗學於詩書敢忘忠義瞻望闕庭臣無任感天荷  
聖激切屏營之至

泗州謝上表

久此投閒初叨遠郡偶緣乏使亟竊名邦被中旨以促  
裝不遑啟處荷上恩之起廢祗劇涕洟已見吏民恪宣  
惠澤謝中伏念臣幼知勤苦中幸採收門戶積衰年齡浸  
晚聖主履至尊之位下材起遠譴之中誠於曩時願效

毫末汗青載筆嘗寓直於瑣闥雖舌含香曾對敷於文  
陛而臣自近疑悔初非棄捐覽輝絕望於赤霄食野愈  
思於豐草四門方闢多士具來臣實何人首煩申令斯  
蓋皇帝陛下盡循古道獨運乾剛服萬物不以威刑驅  
一世躋之仁壽咨詢欲當則左右前後皆正人播告必  
昭則風雨霜露無非教所以小有軫慮未累砥平振古  
德心回昊穹之有赫普天和氣盪災祲以無餘方當大  
酌民言益新邦命伏況瀕淮置郡除吏須材豈宜淪廢

之餘遽誤選求之及今歲事將入而川流漸平臣當更  
謹故防博稽長利不敢飾廚傳將迎以希譽庶幾審詔  
條施設以首公誓報更生之恩終捐九死之命

代河北提刑王朝散謝上表

人物何堪久已安於罪貶事權良重晚復幸於甄收德  
厚察幽感深出涕中謝伏念臣學非知古才不逮人屬逢

上聖之有為偶以微勞而見錄越從長縣擢冒觀風傳  
以羽毛俾注心於寥廓弛其銜轡使寓目於坦平不知

無庸彊欲有立海壖之遠夷貨所交豪商邀利於不貲  
編戶取贏而自入公冒三尺歲失萬金臣嘗究知意謂  
可惜惟是拙謀之欲速且緣羣策之未安妄為更張不  
待報可人言交至聖慮獨私察其本無它情是以第使  
解秩矧待罪之未幾已量能而稍遷委以邊儲責之充  
羨尚因狼戾之入迺微樵爨之憂豈敢告勞粗期弛負  
間關一職荏苒八期況當核實之朝尤慎酬庸之賞何  
幸冗散不終棄捐既濫按刑猶兼視糴論心莫稱隕首



為期斯蓋伏遇皇帝陛下乾坤包荒日月燭隱記憐憫  
散之舊洗除瑕釁之餘欲眾人各致所能恐一夫不獲  
其願臣敢不循省前咎激昂後來庶乎無瘵曠之憂或  
者有補報之効

代朔漕塞侍郎謝獎諭表

金節假使權之重勞苦何裨璽書旌吏治之微丁寧甚  
寵中謝伏以大河北潰比道載騷土功劇荒度之憂興梁  
有病涉之歎睿謨潛運羣策并收親煩稽衆之明首冒

觀風之選馳驅夙夜汭汭往來參諸人意之同斷以臣  
心之見謂夫轉害為利惟因事則不煩至於徙東就西  
亦取道之良便泥塗盡壅郵傳一新曾微通聘之難復  
免鳩工之擾粗可塞責豈敢言功仰承溫厚之辭申以  
光華之錫知臣若是許國奈何此蓋伏遇皇帝陛下撫  
五辰以致績之凝體羣臣以要下之報蓋功必明試而  
悅在見知凡茲班聯孰不動勸誓更殫於駑力期仰荅  
於龍光

代朔漕李楚老謝獎諭表

十行詔札溫然敦勸之辭九府幣餘申以輝華之錫寵  
恩并厚報稱無聞謝中臣頃以迂疎久從廢斥偶上蒙於

記錄復擢貳於輸將及屬大河再隳故道舟車之役斷  
於一方井畝之空脩然千里天衷載軫旰食靡遑親選  
班聯就加視察以臣預領封部叅董役工王事之勞自  
宜盡瘁詔書之迫安得後時盡墾泥涂一新郵傳既免  
民居之墊且微虜聘之難在職當修亦臣常分庶幾道

責豈敢論功而詔使為言璽書加獎又頒內帑并賚私家祇荷眷恩惟知跼蹐恭惟皇帝陛下與人為善明目達聰欲羣臣咸飭爾能恐一夫不獲自盡靡愛慶賞以圖懋功誓竭馳驅仰酬覆燾

代北京謝太皇太后垂簾戒飭官吏表

臨軒共政方祇適於多難申命在公咸靖恭於爾服欽承睿訓增激愚衷臣某

謝中

伏以大行皇帝稽古法堯克勤繼禹允文允武乃聖乃神功燕及於皇天道聿懷於

多福而方虔植壁遽泣遺弓爰資訪落之謀載慎鳧鷖  
之守恭惟太皇太后陛下慈仁世濟濬哲天開叶恭默  
思道之誠助焦勞求治之意申飭小大各安舊常臣某  
等敢不上體至懷下堅素守粗知奉法惟夙夜之不忘  
更誓投軀庶涓埃之自效

代朔漕蹇周輔除侍郎表

內閣邇聯擢陞未幾貳卿高秩掄選載加曾瀝懇之莫  
遑第覩顏而罔措

謝

伏以唐虞制作無曠庶官夏商繼

修亦克用又陛下龍飛天位虎變人文博稽舊章大布  
新典在天則北斗惟喉舌於國則尚書乃樞機竝張六  
曹各領四部侍郎雖掌其貳左民又特其繁唐有司元  
少常伯之名周乃地官小司徒之任凡井田徭賦之政  
與經費貨藏之方其職之所當奉行其屬之所從質正  
必得疏通知遠有為之士以贊美成在久無前之功豈  
宜殊恩橫及瑣質如臣者乏博古之學非濟務之材蚤  
以孤生丁乎盛際晚緣官使誤玷聖知察臣心雖頑朴

而能盡其心憫臣力雖疲駑而能竭其力屢膺明試寢  
歷要津初微一介之先每煩三接之渥固已塵禁塗之  
清切蒙使隰之光華伏況比覲威顏初叨臨遣今故防  
未復而新稟尚虛豈圖旁求更此濫舉斯蓋伏遇皇帝  
陛下對時更化跨古圖勲畢收羣倫與共庶績合輦篇  
以助園丘之樂飾桑弧以叅武庫之兵越先衆人進躡  
榮級臣敢不祇服訓誥底慎事功昧冒為憂輒忘其智  
有所困糜捐是效自許以知無不為庶幾衰羸小補嘉

會

代澶守韓太中授官表

配帝合宮爰遵舊典正名羣吏肇易新階悵盛禮之莫陪媿殊恩之坐及服膺祇訓改觀增輝中謝伏念臣生世

甚寒起家尚幼綴鵬鴻之末跡近日月之清光初乏異能浸階膺仕備員兩省徒有盡規之誠假守四年不無去國之感荷天衷之曲記知臣節之粗殫逮及禮成例沾官賞此蓋伏遇皇帝陛下對眎天地致孝祖宗昭明



不世之休功滲漉無窮之惠澤伏況錄德定位稽古建  
官將使人憂其事而不陵實中於聲而可攷豈容衰陋  
首玷光榮思上荅於至仁唯自期於盡瘁

代劉中書謝加勲封表

祇帝合宮穆神休之如在施仁寓縣藹民氣以為春預  
陪冕黻之嚴均被勲封之錫

中書謝

伏念臣自叅機政浸厯

歲時任重為憂寵至是戒高明日運徒知聖德之不遲  
忠樸慮殫滋愧王功之無補逮總章之親祀肅羣辟之

具來玉軼未馳雨先驅而警道黃流既裸日純耀以排  
氛仰惟信順之所章此豈贊襄之可及已告成於釐事  
肆大賚於寰中衍食增封駢休沓寵此蓋伏遇皇帝陛  
下孝慈致治精稷格幽蹟其始基固可效天而法地推  
諸極至自當咸五而登三澤無一物之不加惠始近臣  
而下逮未知報禮祇有捐軀

代劉中書謝加勲封表

宗祀明堂穆靈心之上應受釐宣室霈皇澤之下馳恩

始近班寵霑異數謝伏念臣施為素短遭遇獨隆未有

絲毫可裨政理徒識古人之大節奉以周旋常憂小器

之易盈命而偃僂既託股肱之任屢承帷幄之言二聖

同心萬邦作乂本中孚豚魚之化獲大有天人之符肆

裸享於合宮肅錫鸞之在御蓋上德孝慈之至厚宜格

於幽雖臣工奔走之靡寧則惟其職及茲慶施首冒寵

光食衍實封勲隆柱國莫遑辭避祇劇矜慙此蓋伏遇

太皇太后陛下法古寬仁躋時富壽聖有謨訓故吾君

常則而行神罔怨恫故斯人竝受其福使太平可以坐致亦羣臣實與有榮惟並言糜捐以圖報稱

代劉門下謝表

驟膺中旨改貳東臺任已重而不勝請徒堅而莫避感深榮寵愧極迂疎臣

中謝

伏念臣素乏賢勞蚤塵柄用思

一介之賤而得志若是顧歷年于茲而報國缺然是以進常內竭于見聞退亦不遑於夙夜借曰知爾則何以空懷盛旦之難逢安有為事而無功方愧中才之不足

已憂昧冒更俾進遷而況黃闥三司之崇侍郎左相之  
亞猥當謀大滋覺人微此蓋伏遇皇帝陛下付物以能  
使臣有禮稽法上古無貳法於後王取士當今不借才  
於異代股肱所寄負棄為憂誓殫積日之勤終覩太平  
之美

代劉門下謝表

備員內史已預秉於政機改職東臺矧重增於事任非  
才第愧成命莫還中謝伏念臣猥以寸長寢叨大用幸聖

明圖國每容言聽而諫行庶法令便民復見家給而人足所以入侍禁闥出居私庭罄胷中之淺聞豈敢有愛思天下之大計懼不足為何期無功更被異數驟遷左省實貳納言此蓋伏遇太皇太后陛下道與治同政求天意欲勵臣節靡愛官榮詢國人言賢豈聞於皆可代大匠斲手終畏於得傷尚竭疲駑以祈報稱

代韓太中乞致仕表

壯而入官老則謝事禮典格言之具在人臣常分以當

然苟唯貪榮祇益招悔用漑肺肝之懇上塵旒纁之嚴  
謝伏念臣奮猶諸生起自下國賴先朝之識拔初脫冗  
流荷陛下之獎知寢膺繁使按刑兩道將漕八期出領  
州麾入聯府案徒坐糜於餽廩曾蔑著於涓埃蓋嘗選  
貳計廷進躋諫省間因便殿數侍清光不以此時少有  
裨補至於晚境寧可激昂一昨蒙召近藩備員大匠當  
陛下董正治官之日實羣公黽俛從事之時而臣年齡  
向衰筋力愈憊既難拜俛莫奉朝趨輒求便私偶幸得

請陪京地近留司務閑雖眷戀於明恩終愧慙於尸寵  
安有鍾鳴而不息庶幾烏倦而知還恭惟皇帝陛下乾  
坤并容日月兼照願賜骸骨許歸里閭亦使追隨垂白  
之民游泳太清之化則甚微蒲柳猶私潤澤之功而已  
晚桑榆尚託舒長之景

代司馬康子植謝應副葬事表

致主之心已淪幽壤飾終之錫更躡舊章兆協卜之以  
時恩殞身而莫報中謝伏念臣祖光以德業名世常擢任



於宰衡臣父康以詩禮成家亦登延於勸講而侈俗方  
改哀楊綰之已亡太醫遽臨痛桓榮之未老無祿私室  
荐罹鞠凶自啟手足之初至掩窀穸之際君命屢至賄  
賜有加復因匠屬之鳩材俾過家塋而視塋殘喘何力  
秋毫賴官此蓋伏遇太皇太后仁深念功禮不遺舊將  
博勸於士類豈曲私於臣門克意紹先獨自期於忠孝  
纏哀待盡兩無報於君親

代司馬康子植謝應副葬事表

忠如皦日痛親志之永沈德及幽泉戴君仁之下逮臣

某

中謝伏念臣父康篤行成已力學傳家二聖以似其先

人一旦欲加之顯任而頃因過毀已屬沈疴揜遺恨而  
莫伸委深恩於不報自初告臥以至喪還賜藥賜珍歸  
賻歸祿優命沓至常分已踰復因匠屬之鳩材俾過家  
塋而視塋克襄大事無費秋毫此益伏遇皇帝陛下禮  
遇臣工孝治邦國將為世忠良之勸豈獨臣父祖之私  
往者不亡當有鬼神之結草微而含氣猶如鳥雀之銜

環



雞肋集卷五十五

欽定四庫全書

集部

雞肋集卷五十九

六至

詳校官庶吉士

臣初喬齡

侍讀臣孫球覆勘

覆校官主事臣李駿

校對官中書臣王鍾泰

謄錄舉人臣邵颿

欽定四庫全書

雞肋集卷五十六目錄

啟

謝授館職啟

揚州謝執政啟

齊州謝執政啟

湖州謝執政啟

上曾樞密啟

南京謝李中書啟

亳州謝執政啟

亳州上李中書啟

賀中書韓相公啟

賀門下李侍郎啟

河中府謝執政啟

賀許左丞啟

雞肋集卷五十六目錄

欽定四庫全書

雞肋集卷五十六

宋 晁補之 撰

啟

謝授館職啟

誤緣公舉既不能引分而終辭濫俾試言又不獲竭愚  
而小補自宜汰斥尚玷題評祗有矜慚安知榮觀竊以  
校讐之設始於漢氏之購書員品之增盛於唐室之好  
士故二代禮樂聲明之為備亦一時衣冠人物之使然



惟麒麟延閣之華近闔闔鈞陳之邃至謂道家羣玉之府蓋象天官東壁之藏近稽有宋之隆專號育材之地故招來於閒暇之日而官使於成就之時職非要而地嚴欲知其可貴祿已優而責寡使得以自修恭惟治平之初深有講求之意詔四三輔選二十人當時彬彬最號得士厥後往往奮為名臣逮神考之末年起治官之廢典是正蘭臺之秩以延虎觀之儒而龍胡莫攀風御已遠欽文母思齊之聖當成王求助之初咨謀大臣修

舉故事繫詔書所以取之之意則欲其有行義政事好  
學而能文至策問所以攷之之方又欲其知忠厚勵精  
扶衰而救溢竊思在上詳延之若是則觀異時施設之  
謂何宜得譽髦以副側席如補之者系出簪紱單平之  
後才非丘園耿介之良不意姓名之無聞乃煩丞弼之  
過聽昭回地近英俊朋來閱九奏於洞庭徒知神駭飛  
雙鳧於渤海更覺身微加以陟岵永悲卧漳久繭孤將  
五千之卒空有壯心立解十二之牛曾無敏手雖欲自

勉竟不能奇攷古不究其本根議政終成於迂濶主父  
屢困九事敢期於八收公孫太疎十策乃微於一得正  
使焦頭而爛額猶足為功真成毀瓦而畫墁尚容見食  
服訓辭之甚厚預刊緝以為榮非止見黃香未見之書  
以資雜博亦欲正劉晏不正之字固有愚衷靜言所遭  
良出於幸斯蓋伏遇某官幾微謀國忠蓋致君深明致  
治之原要在得人之盛

蘇公即云傳百聖道為一世師  
不待文王而興自任伊尹之重

大儒之効吾道方興多士以寧斯文永賴顧容淺陋亦

誤采收昔班超以秉筆得令史而不慙陽城以愛書從  
院吏而自給彼皆慷慨有志之士敦樸可用之才苟得  
以文墨而効官則雖為卑賤而可喜而況加以樂育借  
之美名方朝廷耆艾之具來與巖穴幽奇之咸在世逢  
有道之會人望太平之期屬當是時乃在此選雖復中  
才之難彊猶將奮發於有為補之願治氣養心修辭居  
業粗希前輩豈惟文字之末流未負平生儻以功名而  
自致

揚州謝執政啟

囊空坐笑輒傾將母之誠鈞播無私偶遂佐州之請意  
雖甘於遠外跡終涉於干摩伏自思惟良深震慄竊以  
聖人在上孰不懷利見之心君子處躬蓋亦有常分之  
守智足以圖則當畢慮力可以任則宜竭能固有埽曹  
相之門而藉以求通客常侯之舍而因茲得召志義有  
在夤緣不嫌其次實事未聞虛名可貴所以樊英聘而  
漢稱得衆穢衡棄而魏為失人雖非車輿輓輓之利行

猶曰園林鴻鵠之為觀凡是二者必居一焉如補之者  
質薄自憐學迂寡用陛下纂極之日羣公入輔之初旁  
搜廢捐不間疎逖亦預諸生之選入陪三館之遊朝廷  
清明官省閒暇鵷鸞逸翮競高舉於丹霄麋鹿野心終  
自懷於豐草仰慙教載之惠未知補報之期願試米鹽  
且親甘旨魏君襍被非見汰於盛時蕭子抱關亦各從  
其私好此蓋伏遇某官引君以道附衆以文養材無一  
介之遺建官必羣議之與發為久大故能替於乾坤馴

致中和蓋將興於禮樂夫何小醜首玷至公江陽故都  
民俗信美矧備倖貳足竭疲駑尚假歲時不慙刻鵠之  
類鶩庶幾平昔未忍轉衣而為裳誓殫勤勞粗有寸尺  
仰酬覆燾之德次納甄陶之仁

齊州謝執政啟

擢躋中祕九換歲華丐補外官兩從私便惟愚疎之何  
有實幸會之已多弛負云初拊躬以惕伏念補之總角  
之歲粗習義方始冠之年即嬰家難奮飢寒而自立信

詩禮以無師偶塵科名遂列學校至預讐書之選悉緣  
試藝而升蓬蒿仲蔚之園風雨子桑之屋技無庸而常  
佚老將至而自驚是以陪羣俊而蹲循思古人而緬邈  
自請試事庶幾食功還朝適已踰年於法又當為郡遂  
上煩於聽察因俯徇於悃悰假以名城榮其將母既無  
烹鮮製錦可採之譽滋有羸瓶脫輻不勝之憂斯蓋伏  
遇某官以道事君有功及物推明先朝典章文物之具  
崇養在位靖恭正直之心蓋欲羣工助成累盛故茲優



寄猥逮非宜忘朽木之難雕責駕馬以勿舍人安其分  
事可以興况復此邦素稱難治某自顧無術但知用心  
豈惟鄉飲盥洗才薄不足以化民亦恐柱後惠文威克  
未可以濟務尚稍寬於轡策得小假於歲時倘有秋毫  
上酬鈞造

湖州謝執政啟

承流已幸易地更優荷平施之每加撫中情而屢愧伏  
念補之稟生鄙滯逢世盛明學術素疎入必更文字之

選吏能何取出猶當民社之行且復數奇寡偶孤榮未  
隕之餘而幸刮垢磨光寬大兼容之際蕭條起廢跼蹐  
臨官常欲隨其所遇而必竭筋力之能儻可無歉於心  
而粗塞廩食之責而况河東股肱要害之郡吳興山水  
清遠之邦不緣丐求繼用付畀未覺川塗之邈但知舟  
楫之安自顧何人所蒙若此斯蓋伏遇某官夔龍著業  
丙魏揚聲般役衆工雖各趨而皆當醫調百藥蓋異用  
而咸宜故此下材尚叨器使受恩必報思擁篲以無從

陳力不能念乞身而未可

上曾樞密啟

召還禁閤擢貳樞庭凡在陶鎔舉增慶幸恭以某官忠  
良舊望經濟閎才被遇先朝廻翔近列文章潤色豈徒  
詔令之間樽俎折衝益出精神之動偉聖謨之獨運藹  
賢德以具來果膺揀圖首預機政某蚤緣世舊實被甄  
收悵坐繫於守麾阻趨承於台屏歡欣踴躍倍萬常情

南京謝李中書啟

不度法守致速人言尚賴原情姑從降秩馳驅就道跼  
蹐臨官荷天地之曲成玷鈞衡之平施重叨安便幾至  
涕洟補之聞大匠取材無不可施於繩墨中材見遇悉  
能自附於功名從古以然惟人所任而補之稟資朽薄  
處已拙疎被蒙國士之知塵汚文館之選未嘗試用於  
一事徒茲廩食者十年羣飛刺天自瘞時而遇合決起  
控地獨揣分而退安蓋當庚午之冬即請廣陵之佐居  
然充數坐及成資以彼大邦凡更四守既憊愚之無補

又施設之不專乃廢城闔有故亭榭數里而近歷年于茲至于易弊為新增小使大以職事束於為貳在人情或所不爭而又考李宗諤祥符之圖稽皇甫湜長慶之記蓋即使游觀之舊有玉鉤摘星之名郡當水衝人昔日覩似聞杜牧之句別有雷唐之基明月揚州誰家水調此詩具在此地可求惟昧周防罔思輟止謂經營不急實牽連佐守之時然斧斤未加皆成就還朝之後文檢良在歲月可推非門牆高誼已深察其無它則管蒯

賤生亦安得有今日仍偶去官而會赦乃煩善貸而兼收第解藩麾旋霑祿養仰聖時之忠厚俯小己以驚惶斯蓋伏遇某官以道事君推誠與下無私足以助元化有容足以撫羣倫發為久大之圖馴致中和之盛故寬罪戾未遂棄捐失官與官從近得近使自為計不過若斯已幸匿瑕敢同車馬之不受尚為躍冶深慙桃李之無言固當克謹官箴益修士操信於知己雖後世淺夫慕義感遇之詞亦不失人蓋自昔君子成功立名之本

補之願不忘舊德常在下風

亳州謝執政啟

以罪貶官偷安為幸因嫌易地得近已多每煩造物之  
仁祇劇中情之愧伏念補之本由寒鄙偶在選掄舍矢  
盡遲識野廩之至弱運斤不顧知社櫟之無堪同時館  
中最下郡守竊謂追羣髦則不足營一職其庶幾不圖  
迂疎尚里咎悔量才揣分力如虎以安能計事言功食  
無魚而敢歎蓋既釋耒耜而在此則欲去斗筭而何之

賴蒙矜憐不遠移徙斯蓋伏遇某官引君於道附衆以  
文方薰陶乎太和以積累於至治故記冤瑣不終棄捐  
某敢不慎跣之傷念鞭其後淹留抑末時疊疊而過中  
亮直敢云心怵怵其何極猶有異日寧忘至恩

亳州上李中書啟

夙被採收久知幸會訐俞地重敢復恃於門牆奔走位  
卑自宜疎於竿牘載寢興而念此終震疊而怛然蓋以  
十年之遇未酬一切之儀又闕坐恐魚鳥池林莫還遂



令階庭踵武長埽飄零自力企慕更勤恭惟邇來調燮  
燕閒神明勞相伏以某官贊天化育為士宗師學隘困  
倉曠山川之受納文非纂繡耿經緯之昭回既剛毅以  
有容亦柔嘉而維則此老氏嘗稱君子之盛德抑仲尼  
所謂善人之為邦加以遵正考父之益恭兼萬石君之  
至慎良法美政世但見於持循密議遠圖中已殫於裨  
補要使禮刑達而內叙兵食足而外賓副主上求舊之  
心終先朝用儒之効此大雅意寧衆人知而補之幸逢

休明偶脫泥滓亦欲憤發自見毫毛孤植難伸良辰不  
與平生狂狷之尚中年期待之私一事莫諧三歎何補  
獨竊比漢臣之自誦忘本則難豈徒如魏虜之感恩必  
報而去第以賦分薄而造物不能厚稟資拙而匠石無  
由工開籠鵠失而始驚振手羹空而自笑迷塗未返壯  
日已賒惟激烈之素懷則蕭條而長在每羞王密謁楊  
震之意猶鄙谷永謝王鳳之詞使愚無似有宣光不比  
之稱則賢我公乃獻子可賀之舉然而志濶事迂才疎

効遲下若戰國公子之市名當時羣豪之赴義猶可蒯  
緄彈鋏預三千客而有魚或能左手捧槃招十九人而  
俱敵此自不果它復何言第依庇存姑違疵悔念虛死  
不如立節而止謗莫若自修鶴鳴遠而終聞蘭生幽而  
亦佩誠足動金石則有不誠無不動信可行蠻貊則有  
不信無不行奔覬可馴千里要煩於良馭鉛刀且弊一  
割更繫於善操重惟左右以主張吾道之公有識拔後  
輩之譽取人以恕得士多賢彙茹而升簪履皆在醫門

容疾富績仁鄰寧其中棄之乎既已辱收之矣用此自信獨無介然若唐兩生奏記當路至願為燎供席蒸芝効祥顧有義焉何至是也更望日崇令問益被眷圖早正台衡大庇倫品不惟一士獨荷至私方屆寒涼尚賒侍者伏乞為上自壽副人所瞻下情無任鄉往傾頌懇切之至

賀中書韓相公啟

伏自頃者初膺眷任入預政機屬時三館之虛已在諸

生之選間因造請似辱收憐然闕門之外已疎而朝廷  
之間甚密絕編志墮越俎義慙言不獲伸事無所試上  
辜期待分絕激昂既流落於州麾旋顛危於筦庫伏遇  
左右卷舒以道從違在公雖均佚於留居尚倚平於世  
論慮以罪戾仰玷生成故門墻之問莫修而魚鳥之情  
愈濶側聞枚卜峻陟鼎司遐徼同音歡呼共慶即日伏  
惟圖國有道自天降休恭以某官剛大直溫柔嘉寬粟  
山嶽不動江海有容蹈君子之中庸知古人之出處皇

天祚聖治世立賢煒仁祖之規模有魏公之風烈大數  
已得末流易防一昨初聞命行繼覩章下忠合上慮義  
激士心豈惟以千秋一言而取封蓋將試元崇十事而  
後入以謂可否分年而異處忠邪指類而並驅米斗至  
於千錢民室幾於九去此方今公患之至急與當宁軫  
憂之最深迺大臣先已究知則天下夫復何慮然可否  
但繫於審訪而忠邪正懼於難分虞氏豈非用大中成  
周可謂建皇極既憂讒說之震亦病叨憤之欽嘗聞去

蟻以培隄未有留蠹而蕃木母疾之已甚則固可姑存而勿論則實難彰瘡不清勸沮廼立理有萬慮行非一歧同何必親疏豈皆異魏舒始似無取鄭朋初若可通安得遽知要因久見必使左右皆正直內外無欺誣則可否自陳於前是非不覈而定成周虞氏乃得庶幾皇極大中於焉攸叙憂糴卹莩尚何足言休兵務農便可無患然補之處疎遠而謀近懷褻淺而計深亦恃十年嘗承一盼重念補之稟資頑鄙賦命奇窮勤苦幼能乖

違壯日憂虞晚節摧絕盛時不別不白以得嫌無孝無  
勇以蒙垢遭譴遠徙重罹閔喪終亡僅存再被竄逐遭  
回五六年內往返九千里餘未省蹊田亦遇奪牛之罰  
何嘗盜肉猥逢鬪犬之還不死濤淵稍佐民社世當至  
德之運人望太平之功拾穗行歌問百年而如此飯疏  
沒齒甘一介之當然豈敢謀身尚懷報主耿耿自信昭  
昭實臨更願尊所聞之高明躋斯民以仁壽造次啟沃  
終始持循然後朝廷四海蒙遠猷大夫庶士無遺患國



是永建家聲並隆以副上之倚毗以慰人之頌望旅瑣  
方困閹高莫親

賀門下李侍郎啟

伏自頃者端亮得讒留居均佚旋失芘休之賴即懷顛  
沛之憂茫無事倪若有期會滄溟不改歎自蕩之波臣  
天雨何心笑流行之木偶單舟將母遠道邁凶忠兼孝  
以兩虧影與形而相弔人理斯酷生望莫斬矧未至於  
怨仇仍重罹於竄辱實虞罪垢更累已知故卵翼之惠

山隆而寒暄之儀響闐諒惟大雅闢此細圖不然孤生  
安取今日再聆柄任增激懽悰伏惟即日鼎鑪勞心天  
休助順恭以某官江河致遠柱石扶危文能附而武能  
威剛不吐而柔不茹體和為決以厲濟溫中正而通優  
游以法謀議遠而始驗誠信久而後彰故於仁聖之勃  
興復以勲賢而首用雲行雨施魚躍鳶飛九重開皇極  
之言三事起協恭之慮不為已甚廼見至平民誦斯言  
士知此意然有道也由是廣之而補之稟資甚頑賦命

至薄驚駕難企龍門誤登垂十五年間挽推已至行五十歲矣跋扈奈何抱瑟自憐毀車欲去奪蹊田尚為有罪況廼初不蹊田赦食馬猶足求功而又未嘗食馬滌器不慙市上受經自所獄中糠覈而肥卑溼亦壽似鴉集者多矣何必更占異雞鳴者有之惟知不應既非意可以遣者亦往事安足論哉第以少嘗妄計於進為老欲不虛於期待屬重光之撫運與百執以同升偶脫濤淵稍佐民社起死之恩既厚捐生之誓益堅且緣心困

而慮衡更識言難而行詎噎因戒食折自知醫審曲則  
全悟孫以出正爾局促轅下何由穎脫囊中重惟左右  
學窮象先識際綿炳固曰有容所以大無私謂之王而  
惟危故能論心非幾何以成務且事有可否易辯廼人  
有忠邪難分則欲開大中無忽近慮疏豈皆異同未必  
親袁盎始議絳侯後更獲助鄭朋初通蕭傳卒反見傷  
若此實繁胡可殫視察就義若渴之故審應問如響之  
情借曰比常好先亦意隨必有事造次啟沃終始持循

顯則欲馬不敗羣隱則欲木無藏蠹公是若建朋黨必  
消如此而後天下國家蒙遠猷大夫卿士無遺患觀海  
恐漫睨柯足知雖未乏戴崇宴見後堂之頃然可無陸  
賈微言深念之間竊自比龜智能靈人誠不思蠶飽不  
為已乃曹丘顧金掠美則安敢若魯連解紛無取其庶  
幾亦有命焉非所期也更望日崇令問益被眷圖蚤正  
家司大庇羣品豈惟一士獨荷至私方戒寒涼尚賒待  
省

河中府謝執政啟

明恩起廢首玷劇曹衰疾便私尚叨名聞盡出鈞陶之  
巨賜寧同草木之無知引分每踰撫躬深愧竊以讀書  
非無用之具固將圖試而求行事君當有為之時孰不  
願知而幸遇賢者奮身而任大中材隨類以効長寸陰  
尺璧之匪輕羸糧躍馬而恐後又如出蔀見日去盆望  
天所宜欣對亨嘉鮮明注目安有自為連蹇俛默向隅  
惟能技之不同故會逢之相邈如補之者稟生至薄涉

世又疎違道德之初心獲聲名而過實畫蛇之足嘗奪  
飲而固宜蒙虎之皮或得攻而何怪一昨初湔謫籍即  
備史官以半生文字之中而白首江湖之遠忽蒙此選  
豈是素期故始榮所得而冒居終揣不能而知止屬饜  
為請與郡復優使自為謀不過如是此蓋伏遇某官柱  
石扶遠著龜見微直方大以正邦周徧咸而濟物雖良  
樂所過絕足為已空然和扁一經沉痾猶皆起將益收  
羣俊之助與共底太平之功况補之嘗履閨臺今守民

社未負蘆鹽之學敢忘卵翼之私

賀許左丞啟

再膺制命入秉政機仁賢類升華夏均福恭惟某官徽猷甚遠廣譽早施文能附而武能威濟之以學剛不吐而柔不茹蓋出於中徇公滅私以退為進故能使兩朝而一節冠百吏而獨先上方總攬權綱詢謀治體務進中和之士以期久大之功民俗利疚之悉知人材能鄙之素識欽惟圖舊靡不蒙休而補之書生後來曲士寡



與同形骸於樗櫟寄蹤跡於萍蓬伏念門下召還坤維  
之年再升鼇禁之日實緣典校嘗蒞諸儒眷言賤疎以  
備三館不以年輩官聯之負隅每於勞問與進而甚溫  
旋躋廟堂復在甄治困屢空於甘旨求自効於米鹽似  
蒙獎憐不忍棄外藏中心而敢廢報知己以未遑而素  
拙少思緣公獲坐尚以頃年之責復更數赦之餘上煩  
貸金猶竊安便奪麾符者彌歲徙佐貳者兩邦尤悔寧  
追省循已屢長鞭莫及固駑蹇之難驅大厦方成亦飛

鳴而自喜悵坐縻於官守阻趨奉於鈞閣

雞肋集卷五十六

欽定四庫全書

雞肋集卷五十七目錄

啟

賀門下吳侍郎啟

代上北京韓丞相子華啟

謝何相公啟

賀侯樞密啟

謝韓儀公啟

泗州謝執政啟

代外舅杜侍郎賀姚舍人輝中啟

泗州謝監司啟

謝泗州倅曾丞議啟

謝泗州教授啟

答賀直閣林次中啟

謝龍圖吳雍薦論啟

高麗人使回遠迎狀

謝高麗使送人事物狀

送高麗使副人事物狀

北朝國信大使先狀

雞肋集卷五十七目錄

欽定四庫全書

雞肋集卷五十七

宋 晁補之 撰

啓

賀門下吳侍郎啓

誕膺制檢再秉政機已光選衆之求更竦具瞻之望凡  
居庥廕靡不欣愉恭惟某官致主忠誠濟時賢業寵冠  
三朝之舊譽高百辟之前著龜治忽之所昭柱石安危  
之攸恃久茲均佚未替告猷聿逢圖任之明復貳納言



之重國政弛張之素達人材能鄙之盡知祇賴和衷以  
成累洽伏念補之稟性樸野賦命奇窮早薦歷於閨臺  
晚屢更於麾守嘗遭尤悔旋被洗滌皆朝廷及物之私  
與門牆好士之德尚叨寄委敢怠承宣今川流已復而  
無虞歲事將登而甚美吏知免咎民識樂生仰大廈之  
帡幪固無不芘撫孤蹤之蹉跎當有所歸即日再惟燮  
理宴閑神明勞相屬拘官守阻造台閣

代上北京韓丞相子華啓

孚告治廷改司留鑰遡聞新命竊忤丹悰恭以某官道  
重躬行望隆世濟翊亮四朝之老儀刑百辟之師黃閣  
調元意比勞於鼎鼎赤松嘉遡興已傲於林泉屬訪落  
之云初固思賢之方急茂惟安集尚輟保釐開府加崇  
擁旄增重居然全魏隱若長城伯教素明愛茲棠而敢  
伐公歸寧遽有是袞以宜封某蚤誤陶甄復叨庇賴雖  
簡書之良窘繫履幕之匪遙幸會居多欣愉倍劇

謝何相公啓

峻騰鼎司誕敷制命嘗致門牆之慶粗申簪履之虔偉  
天地之休明曠山川之受納故惟幽介畢獲昭蘓民知  
至善之不忘物識太平之無象即日恭惟持國有道自  
天降康三接益隆百祿是擁伏以某官剛柔體撰文武  
憲邦尊主遠猷隱中甫之維翰宜民善政粵丙魏之有  
聲寬足以得衆而惠足以使人深可以通志而幾可以  
成務大臣絕傷手之斲小人懷隔面之從本於中和成  
此清靜所以不勞施設坐致安榮伏念某稟生拙艱擇

術迂滯以場屋粗知文墨故閨臺誤有姓名然而未嘗  
當一事權任一言責是以初從輕坐終獲盪除齒髮衰  
齡妻孥滿目晚已無心於事業老猶有累於寒饑及此  
分符益知幸會念使功孰與使過况屬盛時儻成仁可  
以殺身敢忘異日顧惟遠跡阻望台閣

賀侯樞密啓

光膺褒制峻執鴻樞國有儒臣以裨上治民知聖澤當  
復下流相與歡愉固無遠近伏以某官高明篤實寬裕

直方岌然髦士之中夙有大臣之氣果逢盛旦自拔周  
行辭章炳蔚足以鼓動四方操節冰霜足以整齊百吏  
事無施而不可才屢施以皆宜曾未十年遂登兩府漢  
千秋之寤武帝何足慕哉唐馬周之遭太宗無以尚此  
洪惟聖主以孝事宗廟思率由於舊章以仁育幅員欲  
誕敷於文德務進溫良之士聿求久大之功必有同寅  
來膺至眷豈惟精神折衝於樽俎之上固將中和明備  
乎禮樂之間而某稟資拙疎賦命褻薄以場屋粗知文

墨故閨臺誤有姓名不慮冗材既盈小器故暫膺於識  
拔已旋致於顛隲然而未嘗任一事權當一言責用汙  
逢於清問遂終削於丹書儻非獲依仁賢當路之餘光  
何以克全孤介末塗之晚節重念補之頃親講習又接  
鄉邦竊比然明辱知子產敢同貢禹恃舊王陽不能自  
躍於鴻鑪乃獨長鳴於峻阪盡煩深察更欲何求貧未  
脫於寒饑尚資廩入老不愆於忠孝猶累生成念賀厦  
之可同悵埽門而無自

謝韓儀公啓

伏念近者特造門牆願親杖屨康寧貌悅千岩松竹之  
間蕭散情長一世塵埃之上不覺聳慕膝屈永歎意消  
顧蚤預於甄收非敢言於嫺婣高明廣逮疎逖咸依尚  
憐孤根未必墜雨生芻一束窘窮巷之坐愁清酒百壺  
陪後堂之宴笑曾忘禮絕滋愧人微綠野放談過晉公  
之高蹈黃花佳唱比陶令之將歸醉猶貸於歐茵狂豈  
誅於落帽顏間和氣席上陽春以此使人何人不盡既

貪知己特達勿貳之意遂整平居淡念欲効之言而莫  
戒轉喉幾成捫舌雖禮不禁嫌諱字亦有同音如肇者  
和帝名也而漢郡存京兆之稱又操者世祖諱也而植  
詩有造日之句載在傳注可以考知乃唐鉅儒若韓吏  
部亦著宏辯欲開後疑晉進既殊釗昭不避仰惟大雅  
固已包荒然令公以三朝德望之尊而不肖有十年門  
下之舊易知罕犯每慎偶疎豈止汗顏真成芒背自違  
鈞席愈攪蓬心悔訟稍瘳蕪詞始叙伏乞略此細故要



諸後圖間順下風且詢公議似聞芝檢已拜玉音想遂  
促於曹裝行復調於伊鼎即日恭惟神明來相寢饋鈞  
休補之田野益疎光儀乍阻蕭然形迹失此庇依已戒  
僕夫將超道左庶欲贊輿誦具瞻之意豈獨伸恩閤私  
戀之情

泗州謝執政啓

久此投閒初蒙起廢已膺近使更竊名邦荷天地之曲  
成玷鈞衡之平施迂疎內揆感涕徒揮伏念某家世久

哀人材甚冗早預諸生之選與從三館之遊羣飛刺天  
同時遇合者自其能爾決起控地無庸不足者安所尤  
哉幸未忽於省循終獲逢於湔洗退無仇怨寧論三歲  
之不興進有盛明未廢十年之乃字里間浸鄙文法逾  
疎顧雖懷遭時有用之心實亦負陳力不能之責斯蓋  
伏遇某官忠誠尊主賢業濟時著龜治忽之所昭柱石  
安危之攸恃豈惟丙魏有聲於漢蓋非堯舜不陳於王  
邦之榮懷必歸其美於上上有大澤必行而致之民災

稷聿消歡謠允塞恭惟挈國尤慎官人敢圖赦過之餘  
廼在選能之列泗雖支郡地實控淮舳舻上下以相銜  
冠蓋往來而旁午今秋潦收涸而川流底平稼已兆於  
豐登吏苟逃於曠失顧承人乏適在此時逢歲有餘乃  
幸乞漿而得酒於生無愛尚欲舍魚而食熊誓以肖翹  
仰酬造物

代外舅杜侍郎賀姚舍人輝中啓

拜命中宸升華西掖側聞新命預劇懼悚竊以舍人制

行溫恭修辭敏達夙蘊濟時之業中懷拔俗之情決科  
從仕者不四三年閉門著書者踰二十載化行閭里共  
畏陳君之知名動京師咸高鄭子之趣二聖垂衣之始  
羣才連茹而來首登老成次起遺逸以謂處阨窮而不  
憫則宜素富貴而能行議禮曲臺衆果推於適變讎書  
東觀士尤服其多聞豈徒居遺闕而抗辭司言動而直  
筆雖亟躋於法從已久屈於公才出則代言許劉超之  
清慎入而承問倚徐邈之博通朝廷得賢中外胥慶某

早塵近列竊企下風未修牆屏之度先辱緘滕之貺永  
言欣佩莫罄叙陳

泗州謝監司啓

久幸投閒初蒙起廢拜明恩而跼蹐奉中旨以馳驅偶  
莅屬城遂依大庇州素稱於繁會力尤病於拙難視事  
云初撫躬以愧伏念某材能甚薄學問又非越自諸生  
蚤升三館再更郎選四領藩麾惟被譴之獨輕故滌瑕  
之前逮付以要郡俾其赴功野鹿情疎念蒿革而常在

疲驚氣索見車蓋以內驚伏遇某官寬厚愛人公忠莅  
事提封一路檢察百城仰惟攬轡之邈然孰不望風而  
惕若更願小寬檢策稍假歲時必有毫釐自圖報稱官  
守所拘不獲趨候門牆

謝泗州倅曾承議啟

恩俞守郡幸會同僚平居想望之深今此從遊之便伏  
以某官賢猷開濟雅趣靖良事業藹其家傳聲名籍於  
衆口方紆佐郡良屈遠猷然而素履允修撫謙更篤宜

入預清華之選寧久從關決之勞惟此拙艱劇於延跂  
歌襦袴之慕深愧非才詠海沂之康終煩敏手方圖馳  
問遽辱惠音黼黻之辭蔚然累幅衰頽之質煥若增輝  
展晤非遙欣愉可既

謝泗州教授啟

比蒙恩檢改莅便州悵馳問之未遑辱流音之先及眷  
言披玩但極感銘伏以某官早擅俊聲躡登科第偉該  
通之經術煥藻麗之文辭暫屈討論亟躋要近某衰遲

假守邂逅為僚敢辭奔走之勤行有晤承之便方茲殘  
渥更厚自持

答賀直閣林次中啟

升華內閣增秩列卿雖揚歷之固宜亦東掄之寢重竊  
以冊府之設非止於藏書文館之名固先於延士大則  
典領譔述或次補法從之崇卑而是正校讎猶擺落常  
流之賤嘗思所以置此之始又念所以待之之殊豈欲  
虛名相矜而徒以廩食養於燕休深廬默坐而不聞



朝廷議論之毫末世務既趨於一切書生亦習於自輕  
迨茲陵夷最號閑冷聖明繼照員品復修方將敷求久  
任之俊良稍以敦勸方來之遺逸猥同聲氣預有光輝  
恭惟某官少以藝文早收科級本於高才達識之自致  
濟以彊學好問而旁通明白不私敏捷立斷事每試而  
皆可居所去而見思烏府郎曹屢更於繁要蘭臺都省  
稍陟於高華果奉明恩更躋祕職猗歟父子之相繼謁  
然兄弟之嘉聲儒者之榮衆人所慕行超騰於近列益

開發於遠圖致主之功計日以竢補之備員中秘絕企  
後塵乃蒙齒記常僚講修故事文馳牋牘暫輩行之非  
宜藏置縑緙傳子孫而為好

謝龍圖吳雍薦論啟

陳編窺竊何補諸生華袞褒榮敢煩一字誤蒙代匱祗  
劇厚顏補之稟生既愚聞道亦淺少日狂狷頗復激昂  
長年艱難稍亦咎悔不幸先子蚤棄諸孤居然為貧初  
此求仕賣刀買犢行藏獨可以自期觀頤舍龜失得不

足以相補竭來泮水三易歲華無它時捧檄之勞有平  
居肄業之樂譬彼倦鳥聊復投林坐令摧頽滋用迂濶  
風雨子桑之席促軫屋穿蓬蒿仲蔚之園披書案朽間  
偶好事惠然晤談務閑偷安考滿當去豈圖過聽乃此  
誤加謂鳬足非長而雞肋可惜收置門館論諸朝廷此  
蓋伏遇某官高才得君強恕待物統綏一道刺舉百城  
如般之運斧斤曾微擁腫若良之操轡策安有疲駕曲  
憐孤生為借餘潤昔張安世不樂私謝而李習之嘗賦

感知趣非不同義各有處更願寬其不及須以後來豈  
無毫釐可卜報効

高麗人使回遠迎狀

伏審航琛入貢館飫言歸瞻九雉之崢嶸夢回天上指  
三韓之縹緲色見眉間候役來聞使輶將及叅承可卜  
欣抃良深

謝高麗使送人事物狀

茲緣迓勞初獲晤瞻入覲日畿慶賜牽之成禮言歸海

國辱展幣以交驩盛意難承珍藏敢置

送高麗使副人事物狀

州僚備位郊犒常儀蚤欽俎豆之風先煩委贄願報瓊  
瑤之好敢廢實筭薄物將誠別封具列

北朝國信大使先狀

茲者歷紀歲端禮欽鄰問眷使輶之于邁幸候館之可  
休冒涉寒威又寧福履趨承良適欣詠徒深

雞肋集卷五十七